

23/01/2003

Proses hantar pelajar ke Al-Azhar diperketat

Mahfar Ali

KAHERAH: Malaysia akan mengetatkan proses penghantaran pelajarinya ke Universiti Al-Azhar di sini, termasuk mewajibkan penuntut terbabit berdaftar dengan Kedutaan Malaysia, kata Penasihat kepada Perdana Menteri, Tan Sri Abdul Hamid Othman.

Beliau berkata, menerusi peraturan itu yang akan dilaksanakan secepat mungkin, semua pelajar juga mungkin diwajibkan mengikuti pengajian selama empat tahun di sini.

Abdul Hamid berkata, peraturan itu akan dirangka sebagai susulan terhadap perbincangan antara Perdana Menteri Datuk Seri Dr Mahathir Mohamad dan Syeikhul Al-Azhar, Dr Mohamed Sayed Tantawi di sini, semalam.

Dalam perbincangan itu, Dr Mahathir menyuarakan kebimbangan Malaysia mengenai kemasukan pelajar secara bersendirian ke universiti itu kerana sesetengahnya tidak memberi tumpuan terhadap pelajaran, sebaliknya dipengaruhi unsur tertentu terutama politik.

Abdul Hamid berkata, pelajar terbabit kerap gagal dan terpaksa mengulangi pengajian sehingga beberapa tahun atau kembali ke Malaysia tanpa mendapat sebarang pekerjaan.

"Mereka ini akan membuka sekolah agama dan secara terbuka menunjukkan perasaan tidak puas hati hingga mempengaruhi pelajar masing-masing," katanya yang memberi taklimat kepada wartawan Malaysia mengenai hasil pertemuan Dr Mahathir dan Dr Mohamed.

Pertemuan itu turut dihadiri Menteri Luar, Datuk Syed Hamid Albar dan Menteri Besar Perlis, Datuk Seri Shahidan Kassim.

Sempena lawatan kerja dua hari ke sini, Dr Mahathir juga menyampaikan ceramah di universiti itu atas undangan Dr Mohamed.

Abdul Hamid berkata, pada masa ini pelajar di 14 institusi pengajian tinggi swasta di Malaysia diterima masuk ke universiti terus ke tahun empat, tetapi kerajaan mendapati kebanyakannya tidak mempunyai kelayakan setimpal menyebabkan ramai yang terpaksa berulang.

Malah, katanya, sesetengah pusat pengajian itu termasuk di Kedah dan Perak tidak mempunyai guru berkelayakan serta kemudahan mencukupi, seperti perpustakaan.

"Kita akan teliti perkara ini dan pelajar yang tidak dapat melanjutkan pengajian ke sini akan diberi latihan kemahiran lain," katanya.